

Biscotte, 5j.



suechet es ruhigs Daheime mit Freigang

Liebi Tierfründe

Hoi Du da, hesch Du es Plätzli für mi? Nid nur im Regau, ig bruuche scho es bitzeli meh Platz. Ig bi übrigens d'Biscotte u uf dr Suechi nach eme nöie Daheime. Warum? Bi üs git's grad personelli Veränderigi u e Züglete schteit ou no ah. U denn chönnt ig nüm usse, geit gar nid, ig muess dusse nachm Rächte luege. Drum!

Ig bi 5jährig, kaschtriert, gimpft, chippet, teschtet, schtuberein, sähr aahänglech u verschmuest. Es Troumbüseli? Genau, das bin ig! Ig bi gsung bis uf, itze chunnt's: ig ha's Rolling-Skin-Syndrom. We mi öppis schträsse tuet, denn zuckets mi u ig wärd ganz verrückt. Sieht us, aus ob ig e Tobsuchtsaafau chrieg. Isch abr so schnäu verbii, wie's chunnt. Du muesch mi denn eifach sii lah u nid aafasse. S'cha nämlech sii, dass ig mi denn vergässe tue u biise, nid arg abr trotzdem u nid mit Absicht, ährlech. Eifach mi äs Momentli i Rue lah. Dr Doc het gseit, cha mer nüt mache, villiicht mau mit CBD probiere, isch abr derziit nid notwendig. Susch bin ig e ganz e Liebi, verschmuest u mega nöigiirig u mönschebezoge, ou bi Frömdi, ig schmiichele mi bi aueni ii. Ig liebe min Freigang i Fäud u Wiese (ig muuse übrigens erfolgriich u bring Dir ou immr mau wiedr äs Gschänkli hei vo mini Usflüeg). Es Dihei a eme Ortsrand wär perfäkt für mi, e verchehrsberuhigte 30er Zone uf di eini Siite u es Fäud odr e Wiese uf di angeri Siite. Ching, Hung u Chatz wott ig ja nid im Daheime, die schträsse mi nur, ich bruuch es ruhigs u entschannts, es schtabius Daheime ohni Veränderige, auso nid immr d'Möbu verschtälle, gäu?

Ig sueche verschtändnisvou, chatzeerfahreni Lüüt, die mir en entschannte Huushaut u Freigang i verchehrsarmer Umgäbig chönnt biete. Lüüt, die wo viu daheime sy u viu Ziit mit u bi mir wönnt verbringe. Bisch Du villiicht pensioniert odr sunsch oft dihei odr machsch Du Homeoffice? U hesch Dur womöglech en Garte ums Huus umme? U Wiese i dr Nächi? Ou ja, denn müeset mir üs unbedingt lehre chenne. Ig wohne derziit no z'Wieden/AG, zügale aber gärn zu Dir, wo ou immer Du wohne tuesch. Mäud Di doch bitte ganz gly bi dr Sonja Ball. Sie het sich mir agno u suechet für mi das nöie Plätzli. Ig fröie mi scho druf, d'Gägend bi Dir z'erchunde!

Dini Biscotte



Katze sucht Mensch - Mensch sucht Katze

Sonja Ball

Tel.Nr. 079 333 45 62 (werktags 18-20h)

kontakt@katze-sucht-mensch.ch